

„Выкопали гріб“ 25-річним Народным новинкам. Хто?

Члены одборной комісії про русиньску народностну меншыну як порадного органу Уряду уповномоченого влады СР про народностны меншыны: Мілан Андраш – председа (як знам, він там за нас боёвав осамочений як єдиний вояк в поли – замінованім „одборниками“ і з особами-„бетоновыма бункрами“), Алена Блыхова, Феодозія Латтова, Мілан Ян Піліп, Ладіслав Ладомиряк, Татьяна Кмцова, Светлана Хомова, Софія Даскалова, Даніел Грубала і Барбора Костоліаньска, а „посвятили го“ компетентны працівници даного уряду і Уряду влады СР. То было повіджено образно, але в реалности будуть мати на сумлінню **ЗАНИК ПЕРШЫХ І НАЙСТАРШЫХ ПОРЕВОЛУЧНЫХ НОВИНОК В РУСИНЬСКИМ ЯЗЫКУ** „з нагоды“ їх 25-річа і 20 років од кодифікації русиньского літературного языка на Словеньску, в чім тоты новинкы зіграли єдну з домінантных задач.

Яким способом, так, же з пожадованых на проєкт *Народны новинкы* од уряду 19.536 євр комісія їм схвалила лем **2 032 еура (!!!)**, за што ся **12 чісел новинок не дасть у тім році выдати!** (На порівняня: подобны, але обшырнішы новинкы *ИнфоРусин* дістали з пожадованых 40 000 євр солідных 30 000 тісяч еур !!!) **Вызерать так, же за пару тыжднів Народны новинкы перестануть дефінітівно выходити, чім ся сповнить і єден із снів єдного конспіратора зо Здружїня інтелігенції Русинів Словакїї, котрый уж много хосенно про Русинів Словакїї зничів а іщі зничить, подля правила, хто не іде зо мнов, хто мене не слыхать, тому амен.** По інформації, кільки нам схвалили на новинкы, обернув єм ся устно і писмово на дакотрых найвысшых челных представителїв Уряду влады СР о дофінанцованя наших новинок, і увидиме за пару тыжднів, ці реакція буде позітивна, або негатівна. Кідь негатівна, так тым новинкы перестануть выходити!!!

Кідь єм зачав од того найважнішого проблему, так доповню то тым, які і як были схвалены русиньсков „одборнов“ комісіов далшы проєкты наших двох обчаньских здружїнь (Русин і Народны новинкы і Академія русиньской културы в СР). На цілофарєбне выдаваня часопису *Русин* (хотїв єм то зробити подля прикладу лемківской „Бесіды“ або войводиньского „Руского слова“, котры суть подобныма часописами) із пожадованых 15 744 євра комісія схвалила 7 200 євр, за што быдеме мочі выдати 6 чісел Русина лем з фарєбнов обалков, як дотеперь.

Академія русиньской културы в СР предложыла на рік 2015 вісем проєктів, з котрых было комісіов схвалено половину (штири проєкты). Першым проєктом із них суть зась піддімензованы інтернетовы новинкы Академія русиньской културы в СР, котрым комісія схалила лем єдну тісячку, хоць на кінці засісаня зіставала резерва, але комісія ю придала на електронічне поеріодікум „*e-rusynFORUM*“ Яна Липиньского, хоць тот мав уж (як все) схвалено пару тісяч євр вєце як інтернетовы новинкы АРК в СР, котры минулого року дістала 500 євр а передминулого року 1 000 євр?!

Дале АРК в СР предложила проекты на выдання семох книжок, з котрых были схвалены і будуть фінанчно підпорены три книжки (унісоно вшытку по 2 000 евр, хоць каждая книжка мать іншы параметры, наприклад, на схалену книжку *Дітём про радость і поучіня* Меланії Германовой сьме жадали 3 160 евр а на книжку *Здогадай, школярику* Юрка Харитуна зась 3 800 евр, бо обидві сьме, як то пасує про діти, хотїлки выдати публікації з твердым фарєбным обалом, фарєбныма ілустраціями, ліпену і шыту книжку. Но за два тісяч свої планы не будеме мочі зреалізовати і будетем мысити одступити од представованой якости. До тройці была схвалена і буде підпорена тыж 2 000 еврами іщі публікація *Нашы горізонты* Миколая Ксеняка.

Несхваленыма были тоты книжки: *Русиньскы солові ІІ*. (ед.) Анны Плішковой, *Фундамент нелем про Русинів* Мілана Семанчіка, *Обычайны слова* Штефана Смолея і *Факлі горять* Юрка Харитуна.

Также довесна наших 5 схвалєных проєктів будуть підпорены сумов **16 232 евра, што сьме приближно просили на 6 чїсла цілофарєбного Русина**, жебы сьме могли конкурувати Русинам на Лековині або Войводині што до формы часопису. Але іщі цілковый вердікт не є знамый, але очекований, а то односно *Народных новинок*, котрым „выкопаний гріб“ може быти і заметаний глинов неоднорности членів і нежычливців нам одборной комісії про русиньску народностну меншыну ці компетентныма працівниками Уряду влады СР?!

Александр ЗОЗУЛЯК,

шефредактор і председа ОЗ Русин і Народны новинки і ОЗ Академія русиньской културы в СР